

西
夏
書
事

西夏書事卷四

青浦 吳廣成西齋 纂

雍熙元年繼遷匿地斤澤夏五月党項哱鬼族請附
繼遷攻宥州不勝仍駐地斤澤地斤善水草便畜
牧生聚漸衆令弟繼冲煽誘諸蕃哱鬼酋領魔病
人七崖素與南山諸族結黨爲亂率其所部請降
繼遷遣張浦往受之

秋七月掠王庭鎮

鎮在夏州西北蕃部所聚繼遷引衆襲之俘擄萬

計尹憲自夏州赴援不及

九月知夏州尹憲都巡檢使曹光實襲破地斤澤繼
遷棄母妻走

繼遷集衆萬餘令張浦李大信等四出俶擾蕃漢
苦之尹憲與曹光實計曰地斤四面沙磧兵難驟

進潛使人偵知所在于是月

王氏東都事畧繼遷母妻不詳年月宋

史夏國傳繫此事于太平興國八年太宗紀則在雍熙元年傳紀不合又紀及實錄皆載于是年十月庚寅者李氏長編云益據奏到之日耳當移見九月今從之發精騎數千夜襲

之再宿而至大破繼遷衆斬首五百級焚千四百

帳獲牛羊器械萬計繼遷與弟繼冲棄衆走妻與
母罔氏皆被獲

按

續綱目書知夏州尹憲襲李繼遷破走之議
者謂其擅兵生事違命邀功致有後日銀州之
敗然除君之惡惟力是視未可以兵行詭道逮
斥之故書襲書破以見宋室未有之捷書棄書
走以見繼遷未有之馭也

冬十二月聚兵黃羊平

繼遷既敗懼官軍追襲轉徙無常處而西人以李

氏素著恩德憫其窮蹙稍稍賑給之繼遷因語豪
右曰李氏世有西土今一旦絕之爾等不忘先澤
能從我興復乎衆曰諾相與屯黃羊平平在夏州
北招來蕃衆兵勢復振于是羌豪野利等族皆以
女妻之宋史夏國傳景德元年繼遷卒子德明立
年二十三母曰順成懿孝皇后野利氏攷
帝紀太宗雍熙元年至眞宗景德元年共年二十
是德明生母非此野利氏可知史臣曰蕃俗諸母
衆多不能備
詳職此故也

雍熙二年春二月繼遷誘都巡檢使曹光實殺之

初繼遷棄銀州蕃部拓跋遇入訴本州賦役苛虐

乞移居內地太宗不許遂作亂夏州巡檢梁迴率兵討破之遇等散居山谷遣人說繼遷曰銀州地居四塞西接夏綏東鄰麟勝公家先澤未遠若潛師以來遇以蕃衆濟之城可得也繼遷問計于衆從弟延信曰地斤之役乃備禦之疎非戰鬪之罪漠北不足以立室家今遇衆來歸天假之便失此不圖後悔何及張浦曰時不再來機不可失但曹光實老將知兵若不誘之難城攻其無備我軍大創之餘鶴唳風聲難保必勝也于是令弟繼沖糾

合蕃族自與豪酋破丑重遇貴

新唐書党項居雪山者曰破丑氏又

慶州有破丑氏三族

及張浦李大信等赴銀州

宋史夏國傳繼遷等赴夏

州以詐降誘殺曹光實于葭蘆川而光實從子克明傳光實擊敵于葭蘆川戰歿克明時護輜重在後懼軍亂秘不發喪陽令人西來傳光實命還軍銀州而潛與僕張貴人敵中護光實尸還夫既云還軍銀州則繼遷給光實當不在夏州也

給曹光實云我數奔北勢窘

不能自存公許我降乎因致情款陳講甥舅之禮

期日會于葭蘆川納節光實信之且欲擅功不與

人謀及期繼遷設伏領數十人近城迎光實光實

令從子克明護輜重在後自從百騎先赴之繼遷

前導北行將至其地忽舉手揮鞭伏兵起殺光實
殲其從騎

按春秋書楚子誘蔡侯般殺之曰誘者惡其誦
也然戰爭之際身居將帥而爲人所誘獨無責
乎是時繼遷以詐降之計殺光實雖繼遷之誦
亦光實之愚有以致之不書戰死而書誘殺交
譏之也

遂入銀州據之自稱定難軍畱後以張浦劉仁謙爲
都押牙預署諸州刺史等官

繼遷既殺光實假其旗幟襲破銀州獲軍資器械
無算于是蕃族附者日衆李大信等議推繼遷爲
定難節度西平王號令蕃衆張浦曰自夏州入覲
無復尺疆今甫得一州遠爾自尊恐乖衆志宜先
設官授職以定尊卑預署酋豪各領州郡使人自
爲戰則中國疲于備禦我得盡力于西土矣繼遷
曰是我心也遂稱都知蕃落使權知定難軍畱後
以浦仁謙爲左右都押牙李大信破丑重遇貴爲
蕃部指揮使李光祜李光允等爲團練使復署蕃

酋折八軍爲并州刺史折羅遇爲代州刺史鬼悉
咩爲麟州刺史折御乜爲豐州刺史弟延信爲行
軍司馬其餘除授有差

三月焚會州城

銀夏夷落散居川谷平時雖各有鞍甲並無魁首
統攝繼遷自得銀州乘勝攻會州直抵城下縱火
焚毀城郭吏民死者千計會州由是淪陷太宗遣
知秦州田仁朗閭門使王侁副使董愿宮苑使李
繼隆馳傳發兵討之并賜勅書與麟府銀夏豐州

及日利月利諸族諭之并力

按

會州地居四塞銀夏有警秦涇援師皆得赴
此爲戰守計今繼遷取之而不能守火毀其城
以絕中國駐兵之所異時銀夏數州失而不復
非職此故耶

進攻三族砦砦主折遇乜以城降遂圍撫寧砦

繼遷連取二州益以強大率兵掠銀州巡屬之未
下者攻河西三族砦三日砦將折遇乜殺監軍使
者與之合繼遷乘勢抵撫寧圍之

按降者勝服之詞謂敵力強已力屈有以致之
遇也殺使獻城非力屈比也書以罪之

夏四月扼濁輪川與官軍戰敗績棄銀州走

田仁朗行次綏州請益兵畱月餘聞繼遷兵攻撫
寧喜曰戎人常烏合寇邊勝則進敗則走不可窮
其巢穴今繼遷嘯聚數萬盡銳以攻孤壘撫寧小
而固非浹旬可破我俟其疲以大兵臨之分遣強
弩三百邀其歸路必成擒矣部署以定故示閒暇
縱酒携蒲副將王侁等媒孽之太宗聞三族陷徵

仁朗還下御史獄劾問請益兵及陷三族狀仁朗對曰綏夏二州兵皆以城守爲詞不依調遣所部千餘人皆曹光寶舊卒器甲不完故請益兵三族去綏州遠非元詔所救也臣已定擒繼遷策會詔至不果因言繼遷得羌戎情願優詔懷來或以厚利啖部落酋長令圖之不爾他日大爲邊患太宗特貸死流商州命侁等進兵侁率所部由綏州至濁輪川繼遷撤撫寧圍拒戰喪失五千餘麾下沒邵浪悉訛及兔頭川東西諸族皆破遂領蕃部棄

銀州遁

按戎人烏合厚利可啖當日宋廷之上計中敵情者仁朗一人而已使果用其謀則撫寧一戰應有全功乃王侁小人忌能誤國戰雖倖勝而自濁輪之役繼遷請婚以結強援僞降以歛兵勢寇環州則大合戎類取靈武則先據山川秘計深謀歷久愈熟故銀州之棄塞翁失馬未足爲繼遷憂也

署代州刺史折羅遇戰歿于悉利砦降將折遇七被

獲

繼遷既敗王侁收復銀州率兵出州北至悉利諸族署代州刺史折羅遇與弟埋乞迎戰敗死侁復由開光谷西趨杏子坪敗保寺保香諸族首領埋九已等兵斬五十七人又破保洗兩族俘三千人降五十五族擒三族岩叛將折遇七誅之于是三族豪酋折八軍等三千餘衆皆遣使獻馬首罪願改圖自效爲國進討

夏州岷伽羅膩等族附繼遷六月內客省使郭守文

擊之諸族皆破滅

繼遷濁輪之敗蕃族雖破而本部未潰夏州鹽城
鎮岌伽羅膩十四族俱黨項種落繼遷誘之合遂
與吳移越移等族結黨應援守文奉詔自三交乘
驛趨夏州偕尹憲引兵至鹽城鎮吳移越移四族
請降岌伽等不應憲與守文合擊之擒斬千百校
千餘帳銀麟等州諸部一百二十五族合萬六千
一百八十九戶皆內附一族砮酋豪折御乜窮蹙
棄繼遷歸命守文置之部下

宋史尹憲傳憲護夏州兵殺戮三汭醜奴

莊岌伽羅賦十四族及其渠帥雍熙初詔就知夏州攻破李繼遷之衆于地斤澤攷党項傳雍熙二年六月夏州尹憲引兵至鹽城吳移越移等四族來降憲等撫之岌伽羅賦十四族拒命憲等撻斬千計又郭守文傳雍熙二年夏人擾攘詔守文討之破夏州鹽城鎮岌伽羅賦十四族憲傳載在雍熙前

雍熙三年

契丹聖宗統和四年

春二月繼遷初降于契丹

契丹西境直對夏州党項東山諸部臣事者多李氏自思恭賜姓未嘗外附繼遷見諸部潰散謀于衆曰吾不能克復舊業致茲喪敗兵單力弱勢不得安北方耶律氏方強吾將假其援助以爲後圖

乃遣張浦持重幣至契丹請附契丹主隆緒意未
決西南招討使韓德威言河西爲中國右臂向年
府州折氏與銀夏共衝劉漢致大兵援應無功今

李氏來歸國之利也宜從其請契丹主納之

遼史
西夏

傳初西夏臣宋有年賜姓曰趙聖宗統和四年繼
遷叛宋來附遂復姓李攷是時繼遷未賜姓也遼
史
誤

按

此西夏臣契丹之始李氏自彝殷救晉未嘗

與契丹相通今繼遷稱臣事之書初降以著其
去夏就夷之罪

夏四月契丹投定難軍節度使都督夏州諸軍事

契丹主以繼遷效順遣侍中蕭里得持詔授繼遷

定難軍節度銀夏綏宥等州觀察處置等使特進

檢校太師都督夏州諸軍事繼沖爲副使

遼史百官志統

和四年置夏州管内蕃落使授李繼遷置四蕃都軍所授李繼沖與聖宗紀及李氏長編異

冬十二月如契丹請婚契丹許之

繼遷既受契丹官兵勢稍振自以五百騎款契丹

境言願婚大國永作藩輔時契丹將耶律盼與宋

戰于泰州不利契丹主欲使繼遷牽制宋兵許以

公主歸之

雍熙四年

契丹統和五年

春二月繼遷侵夏州敗知州安守

忠兵于王庭鎮

繼遷兵掠夏州徘徊不遽進知州事安守忠率衆三萬擊之至王庭鎮繼遷設伏誘戰大敗守忠兵追及城門而止

按

書侵是掠境未攻城也春秋兵詭道而勝之曰敗如隱十年公敗宋師于菅是也繼遷設伏以致守忠掩而覆之較之薄未陣者其計更詭

遂圍夏州夏四月麟州援師至乃還

繼遷進兵圍夏州逾兩月不解知麟州韓崇訓領
大兵赴援乃退

夏五月李繼捧出爲崇信軍節度使

繼遷數爲邊患有言其悉知朝廷事蓋繼捧泄之
乃出之于外并改其從父澧州刺史克文爲博州
單州刺史克憲爲道州防禦使並遣之任宋制憲
五代藩鎮之弊特制諸州通判凡知府公事必長
史通判簽議連書方行時太宗親選常參官爲二

州通判以專郡政

秋八月屯兵黑水河邀擊銀夏綏府都巡檢使石保興兵敗績

繼遷居沙漠逐水草便于攻掠是時屯黑水河側據險自固石保興方巡按罨子砦繼遷以數千人攻之見保興所部不過二千人遽渡河決戰保興伏兵河澌俟半渡擊之繼遷衆亂大敗

冬十一月党項咩兀等族謀殺繼遷不果

繼遷凶忍虐用其屬宥州党項咩兀等族首領都

指揮遇乜布九人謀誅繼遷時繼遷剋期攻銀州會諸族于無定河側遇乜布等以暗箭射之中其鼻創久不愈師期乃緩遇乜布以聞太宗賜敕書安撫之

按此党項異繼遷之始

端拱元年

契丹統和六年

春二月李繼捧遷威德軍節度使

初繼捧出爲崇信節度崇信地狹境偏不得專郡政心怏怏佯上言繼遷凶頑少智朝廷若遣其親信以恩禮招徠之可不煩兵致也太宗用其言徙

陝西路威德軍節度以招繼遷

三月繼遷遣牙校李知白貢于契丹

繼遷以契丹許歸公主逾年不見真命遣知白表
獻請之

按此李氏事契丹之始書貢誌始且備事也

夏五月繼捧復爲定難軍節度使賜姓名趙保忠

朝廷數以勅書諭繼遷及同叛蕃部繼遷佯遣都
押牙張浦詣知環州程德元所陳歸順意然終不
出降侵擾益甚諸將用兵皆無功宰相趙普言繼

捧所鎮隨州與繼遷聲問遼遠不若委以銀夏故地令圖之太宗因召赴闕賜姓名親書金花五色賤賜之授夏州刺史充定難軍節度使及銀夏綬宥靜等州觀察處置押蕃落等使賜黃金千兩銀器萬兩錦綵二千匹并賜所管五州錢帛芻粟田園保忠辭曰太宗宴之長春殿賜襲衣玉帶銀鞍馬及副馬百匹謂之曰若繼遷歸欵當授以官也保忠荐內殿崇班張繼能材武乞爲副乃命繼能同經理西事遣都虞候王杲領兵千人護送赴鎮

杲還保忠賤以方物杲不受

畢氏續資治通鑑于
雍熙元年九月知夏

州尹憲襲破李繼遷下卽云于是賜李繼捧姓名

趙保忠授夏州刺史定難節度以討繼遷至是年

五月復敘之殊爲舛

複今從宋史太宗紀

張溥曰繼捧懦而不制繼

遷狡而得衆彼惟爲昆弟諸父所怨祈留京師乃

令其歸招繼遷無論繼遷不肯下反失一繼捧矣

冬十二月趙保忠言繼遷降

保忠至鎮數月上言繼遷已悔過歸誠乞賜官職

安之

按

繼遷實未請降保忠妄奏以示已功誑君固

位其罪大矣

授銀州刺史充洛苑使不受

太宗允保忠請授繼遷官

畢氏續資治通鑑作銀州刺史西南巡檢使與

宋史夏國傳異繼遷不受

按

宋信保忠之言授繼遷官而繼遷未降肯遽

受命耶宋于此猶不悟前言之妄真爲保忠所

愚矣

端拱二年

契丹統和七年

春正月繼遷上表契丹請與繼捧

通好不許

繼遷自言與兄繼捧有怨乞與和好契丹主知其非誠不許

三月貢于契丹契丹以義成公主嫁之

契丹主封王子帳節度耶律襲女爲義成公主下

嫁繼遷賜馬三千匹

宋史夏國傳云雍熙三年契丹以義成公主嫁李繼遷與

遼史西夏傳不合

夏四月趙保忠言降宥州御泥布囉樹等族加特進同中書門下平章事

保忠表言臣遵詔市馬三百匹宥州党項御泥布

西夏書事 卷四 十四
囉樹二族党附繼遷不肯賣馬臣領兵掩殺三百餘人擒百餘人其族卽降太宗獎諭之加保忠特進同中書門下平章事

按特進同中書門下平章事宰衡職也保忠空言得之宋君臣不察授之書以交譏也

秋八月趙保忠言夏州馬生二駒

在州民程真家保忠以聞

按馬兵象也繼遷寇勢方張二駒之生天示之兆保忠藉以獻瑞妄矣

九月党項慎州節度使佶移附繼遷其子突厥羅請
內屬

初繼捧入朝党項諸族渠帥半請內屬青岡嶺三
角城龍馬川兀泥中族大首領佶移首先歸附授
慎州節度繼遷知佶移爲大族使張浦等數誘之
遂復叛降其長子突厥羅率千餘帳使人至府州
折御卿軍前請內屬御卿以聞

附
劉渙西行記賀蘭山西北回鶻麼囉王子邈
擊王子部落甚盛向無統屬端拱中李繼遷破

滅之其地遂成荒穢攻宋史回鶻傳端拱二年
九月麼囉王子邈拏王子及回鶻都督石仁政
越黜黃水州巡檢四族來貢宋賜以錦袍銀帶
不言繼遷攻滅疑記有誤

冬十月攻熟倉族首領咩唼出兵擊之走還

熟倉會州蕃族首領咩唼素惡繼遷繼遷以兵攻
之咩唼合來離諸族兵掩擊繼遷不勝走還

十二月掠西蕃貢使于橐駝口

靈州橐駝口夏州入中國要路諸蕃由此貢馬京

師繼遷兵扼之不得達環州右班都知周仁美率
騎士赴援繼遷兵乃退

淳化元年

契丹統和八年

春三月繼遷貢于契丹

初繼遷流離沙磧雖臣事契丹貢不成禮及契丹
妻以公主羌部懾服輸牲畜者日衆繼遷遣使如
契丹謝獻良馬二十匹粗馬二百匹驄一百頭錦
綺三百匹織成錦被褥五合菴蓉砮石井鹽一千
斤沙狐皮一千張兔鶻五隻犬子十隻自後每歲
八節貢獻

夏四月趙保忠言破繼遷于安慶澤繼遷中流矢走
繼遷駐兵磧中安慶澤數與沿邊熟戶搆難疆吏
以聞保忠上言遣使諭之不聽已將兵討擊繼遷
拒戰不勝中流矢遁去

冬十月攻夏州趙保忠乞濟師

繼遷謀取夏州遣破丑重遇貴等至州詐降謂繼
遷創甚不能軍保忠信之不設備繼遷陰合諸族
渠帥突攻州城保忠出兵拒戰重遇貴等從中起
保忠僅以身免遣使上表乞援

冬十一月獻捷契丹

繼遷攻夏州月餘不能破休兵王庭鎮遣張浦至契丹以大敗宋軍告

十二月契丹封繼遷爲夏國王

時契丹敗于徐河大將耶律休哥創甚國中奪氣遣使促繼遷進兵加以王封令益困中國

宋史夏國傳雍

熙三年契丹封繼遷夏國王與遼史聖宗紀異

張齊賢曰契丹與中國

爲難慮繼遷感中國之恩斷右臂之勢署王爵以縻之遣戎使以鎮之王爵至則刺史之命輕矣戎

使至則動靜皆伺之向背之心異矣夫夏國王之稱虛名也而在契丹命之于彼國無損于中國爲敵其謀不甚深哉

按此李氏稱夏國王之始書契丹封惡其煽亂也

附遼史聖宗紀及西夏傳統和八年十二月李繼遷下宋麟鄜等州遣使來告攻是時繼遷未得銀夏焉能越取麟鄜宋史紀傳並不載

西夏書事卷四終

西夏書事卷五

青浦 吳廣成西齋

淳化二年

契丹統和九年

春正月商州團練使翟守素將兵

援趙保忠于夏州

太宗命守素率大兵援保忠賜保忠茶百觔上醞

十石

附

遼史聖宗紀統和九年二月夏國王李繼遷

遣使獻捷攷是時繼遷無與宋交兵事意卽告

下麟鄜等州之僞詞耳故不書

夏四月謝契丹封冊

繼遷遣杜白

遼史西夏傳作李知白今從聖宗紀

至契丹謝并請合

兵入寇

秋七月由趙保忠請降授銀州觀察使

繼遷走漠北幾十年阻兵嗜殺蕃部被役屬者胥怨夏州之戰雖敗保忠兵部下指揮朗吉等潛相攜貳時聞翟守素至夏州恐兵力不敵詐遣人由保忠奉表謝罪朝廷信之遂授以官

按

此繼遷受宋命之始書以爲後日書反張本

賜姓名趙保吉

弟繼冲賜姓名趙保寧授綏州團練使母罔氏向
爲曹光實所獲封西河郡太夫人留養京師命知
制誥王禹偁草制賜之保吉餽良馬五十匹爲潤
筆禹偁不受

按此西夏受宋姓之始

八月趙保吉上所授勅命于契丹

保吉先以復綏銀二州告至是復上勅命

按宋史夏國傳終繼遷身不書賜姓名茲書趙

保吉惡之也寵以天潢之屬不能易其倔強之心是宋欲愚繼遷而適爲繼遷所愚矣

九月趙保忠言破保吉于王庭鎮保吉走鐵斤澤

王庭鎮爲夏州外蔽地連沙磧向有寨柵可守保吉于雍熙中焚毀之是時將兵據其舊址以窺夏州保忠上言帥衆乘夜擊敗之熟戶貌奴猥才二族以兵邀截奪牛畜二萬餘保吉復棄銀州奔入鐵斤澤

冬十月出攻熟倉族

熟倉大族東西蕃部五千餘帳皆保聚巖谷爲環
慶藩籬保吉不得熟倉不能入環慶遣使誘之曰
身已歸朝賜國姓今後請勿相拒共稟朝命諸酋
勿應保吉由鐵斤澤引兵攻之哱哱復率來離諸
族拒戰保吉始退

趙保忠復言破宥州禦泥布羅樹二族

保忠奏二族旣降陰使人朋附保吉已率兵襲破
之併其衆

十一月趙保忠叛以夏州降契丹封西平王復姓名

李繼捧

初保忠歸朝非其本意及受命圖保吉陰與之通
保吉復使人以契丹命誘之許以重復王爵永鎮
夏州保忠心動遣使表附契丹契丹主授推忠効
順啟聖定難功臣開府儀同三司檢校太師兼侍
中封西平王復本姓名 呂忠曰保忠之再入夏
臺故地趙普之謀也而保忠反與保吉合爲邊患
附契丹普能知符彥卿之不可與以兵權何不能
知保忠之不可復歸其州耶

按春秋例凡叛賤者不書故成十七年齊高無咎之子以盧叛襄二十九年齊高比之子以盧叛不書必卿佐而後書襄二十六年衛孫林父入于戚定十一年宋公弟辰入于蕭十三年晉趙鞅入于晉陽荀寅士吉射入于朝歌此四者則書叛夏州雖保忠舊業然納爲王土身爲王臣一旦據以外附非叛而何宋史遺其事不書茲特補之以正其罪

淳化三年

契丹統和十年

春正月保吉復入銀州契丹兵至

大掠

保吉既誘保忠臣契丹復引兵入銀州據之遣使
由保忠請命入貢契丹主聞其懷二心遣西南招
討使韓德威率兵持詔詰之德威至銀州遼史聖
宗紀及
德威本傳俱云持詔至靈州攷是時靈州尚屬中國保吉所據乃銀州耳遼史誤保吉託
以西征不出見德威怒縱兵大掠而還

夏四月請通陝西互市

保吉自婚契丹歲時貢獻悉取資于蕃族財用漸
乏時陝西尚嚴邊禁積外商旅不遵保吉上言王

者無外戎夷莫非赤子乞通互市以濟資用太宗
詔從之

冬十月復貢于契丹

保吉以德威侵掠告契丹契丹主賜詔拊諭之于
是復遣使貢

十一月趙保忠貢白鶻

保忠既臣契丹與保吉謀益密朝廷未悉其奸謂
銀夏安靜優其俸給歲終賜予並加等保忠遣使
獻白鶻號海東青太宗詔以久罷田獵還賜之

吳炯

五總志云登州海崖中有鷗能自高麗一飛渡海
名海東青唐人呼爲洪雲兒本朝趙保忠曾得之

淳化四年

契丹統和十一年

夏四月保吉反寇慶州

保吉雖復綏銀猶以未得宥夏等州遣使入請太
宗不許保吉怒曰五州故地先業畱遺拓土展疆
是誠在我乃令于衆曰身雖薄德承累世之澤撫
諸族之豪安能迷運守常投身沙漠諸君其努力
圖之遂以李大信爲蕃部都指揮使率衆犯慶州
州北直接沙漠地形漫衍無險可恃時以保吉納
款戰守無備兵至人情駭懼知州劉文質以私錢

二百萬給賞于是士皆奮關大信不能勝

秋八月入原州

陝西歲比不登加以餽餉勞擾民不堪命保吉偵知虛實率兵入原州圍牛欄砦與圍練使石保普相持數日乃還

冬十月圍環州除鹽禁

西羌部落種藝殊少惟用池鹽與邊民交易穀麥保吉自銀州入擾朝廷震怒陝西轉運副使鄭文寶建議以爲銀夏之北千里不毛但以販青白鹽

爲命請禁之以困戎人保吉可不戰屈也數月西
人大困沿邊熟戶無以資生皆叛歸保吉保吉合
四十二族首領盟于楊家堡引兵萬三千人寇環
州石昌鎮屠小康堡知環州程德元擊之不退太
宗詔知制誥錢若水馳驛詣邊弛其禁撫慰諸羌
乃已

按

青白鹽爲西人生計之原自保吉兵起一再
禁止歷德明元昊遂失其利夏國緣是終臣文
寶之策未爲過也但太宗旣從其議宜令邊臣

豫爲之備保吉雖強豈能肆逞乃戎人擾動遽而改圖是朝廷之禁令憑敵勢爲轉移豈謀國之計哉

淳化五年

契丹統和十二年

春正月保吉徙綏州民于平夏

牙將高文峽反攻之遂棄綏州

保吉兵至綏州令保寧徙民歸平夏牙將高文峽唐刺史思祥後也世官綏州因衆不樂率羌酋蘇移山海夜母馱香等反攻之保吉兵敗棄城走文峽舉綏州降太宗詔授綏州團練使蘇移山海等

爲懷化將軍

宋史孫全照傳淳化五年率兵與李繼隆克綏州因與張崇貴等同戍守

之與宋史

夏國傳異

按

徙民大舉也平素恩義未孚鮮有不敗事者

況保吉以兵威脇之不特衆叛且親離矣綏州

之禍乃其自取于文晄何誅

三月趙保忠出次于野保吉襲敗之併其衆

初保吉攻圍諸砦掠居民肆焚積聚靈州及清

遠軍以聞

王氏東都事畧保忠爲保吉所誘陰與之合來寇靈州宋史夏國傳淳化五年

正月保吉圍堡砦掠居民焚積聚遂攻靈州李繼隆諸傳亦以攻靈州爲文攷太宗紀淳化五年正

月癸酉以侍衛馬軍都指揮李繼隆爲河西行營都部署討李繼遷不言繼遷攻靈州至至道二年五月方書繼遷攻靈州則是時尚未犯靈州也故李氏長編云繼遷焚掠堡砦靈州及清遠軍以聞太宗命馬軍都指揮李繼隆爲河西都部署尙食使尹繼倫爲都監討之保忠聞繼隆兵至挈其家人吏卒壁于野外遣牙將李光祚告保吉保吉欲併其衆縛光祚帳中以輕騎乘夜襲保忠營保忠方寢聞難作散衣披髮單騎走還資財器用悉爲保吉所奪會繼隆前部金明鎮使李繼周兵至保吉令蕃部數千邀之石堡砦不克而退

按保忠節度五州當大軍將至儲糗糧具卒乘以效前驅分也顧乃挈其母妻壁于野外何耶想其內不自安擇營利便緩則出迎王師急則走依保吉甚則叛投契丹狡免三窟情或有然卽其被襲走回焉知非賺入夏州以爲內應計耶奸雄之智真愈久愈幻矣

夏州將趙光嗣執趙保忠幽之保吉復棄銀州走漠中

保忠嘗遣其牙內指揮李光嗣入貢光嗣潛輸誠

欵太宗賜國姓授供奉官尋遷禮賓副使使還鎮
凡保忠動靜必以聞既而保忠陰通保吉光嗣盡
出家財散士卒誓効順及李繼隆奉命討保吉保
忠猶獻馬五十匹上言已與保吉解怨乞罷兵太
宗怒甚詰保忠云不斬繼遷開狡免之三窟潛疑
光嗣持首鼠之兩端立遣中使督繼隆移軍擊保
忠師壓境保忠已爲保吉敗回光嗣執之幽于別
室開門迎繼隆裨將候延廣監軍秦翰議誅保忠
繼隆曰保忠机上肉耳當請之天子乃執送汴

會氏

隆平集保忠歸夏州又潛與保吉爲表裡遂任依
之保吉不納復還夏州牙校已據其城保忠不得
入王師俘保忠以歸故保吉因保吉聞保忠被執
併夏州之地與宋史夏國傳異

遂棄銀州走漠中宋史秦翰傳王師次延州翰慮
保忠遁逸卽馳驛先往矯詔安

撫以緩其陰謀及王師至翰又諷保忠以地主之
禮郊迎因並驅而出遂就擒沈括筆談繼隆奉詔
由克胡渡河抵綏州諸將請駐兵石堡砦以觀
隙繼隆曰今惟乘銳疾馳出其不意擒之若停石
堡夏州備禦完固不得入矣卽將兵日夜馳三百
里至夏州保忠猶未之知倉猝出迎遂執之攷李
氏長編云保忠先已出次野外旣爲保吉所
襲及還光嗣遂執之安得再出迎王師也

按

觀于此而知夏州之亂保忠成之卽保忠甚
之也當其入朝伊始憾諸父之相懟願獻五州

以圖榮寵及夏臺再鎮則與保吉通連任其反
覆藉以煽動戎人畱資富貴蓋兩人謀雖同而
心自異也迨事機敗露身爲光嗣所幽保吉聞
之亦去豈非內援旣除外望自絕耶然而七載
無功五州終失名居叛逆身作俘囚噫若保忠
者真李氏之豚犬有宋之蝥賊矣

夏四月削所賜姓名銀夏帳族皆內附

太宗下詔削保吉姓名復爲李繼遷又以夏州深
在沙漠常爲奸雄竊據欲墮其城宰相呂蒙正曰

自赫連築城以來世爲關右之患若遂廢之萬世利也因盡遷其民于綏宥等州以官地給之于是銀夏州管勾生戶八千帳族俱棄繼遷內投

五月趙保忠至闕賜爵宥罪侯

保忠至闕下白衫紗帽待罪崇政殿廷太宗詰責數四保忠不能對但頓首稱死罪詔釋之賜冠帶器幣並賜其母金銀等器尋補右千牛衛上將軍封宥罪侯使之就第宋制諸衛上將軍及大將軍等銜並環衛官無定品惟宗室爲之保忠雖責降

太宗猶以賜姓待之也

按

書賜爵譏宋失刑且失賞也昔東漢彭寵據
漁陽叛蒼頭子密殺寵以降光武封爲不義侯
北魏宦官符承祖坐贓應死孝文原之封佞濁
子斯二者史臣猶議其非況保忠身爲叛逆罪
又甚焉而有之侯之是叛逆可宥何罪不可宥
叛逆可侯何人不可侯哉紊刑賞而壞名器太
宗此舉所失多矣

繼遷母罔氏羈于延州

罔氏卽曹光實所獲者參政寇準請斬于保安軍北門外以儆凶逆宰相呂端曰昔項羽欲烹太公漢祖曰遺我一杯羹夫舉大事者固不顧親況繼遷悖暴之人哉且今日殺之明日繼遷可捨乎不然徒樹怨仇而益堅其叛心宜置于延州使善視之以招繼遷雖不能卽降終可以係其心而母之

生死在我矣太宗從其策

司馬光涑水記聞及呂誨補其祖正惠公端傳

以爲此事在端爲相準爲樞密副使時據長編攸異云與二人進官年月不合蓋準于淳化二年爲樞副九月改同知四年六月準罷端始參政五年九月準亦參政至道元年四月端拜相仍參政二

年七月準罷參政端相如故咸平元年十月端罷相端在中書凡六年其初爲參政時準卽罷樞密矣補傳記聞皆誤又云淳化五年四月詔削奪繼遷所賜姓名或因是準欲斬其母而端救之耳今宗其後罔氏病死延州

六月繼遷屯橐駝路熟藏族首領虬遇擊之走還平

夏

繼遷旣遁李繼隆遣弟洛苑使繼和入奏請于銀夏南界山中增置堡戍斷敵糧運且爲諸部熟蕃之蔽繼遷聞之先率兵扼橐駝路脇兩州內屬戎人及橐駝等物歸平夏党項熟藏族首領虬遇率

所部反攻繼遷敗之其弟力戰而死遇內歸太宗
詔授會州刺史

秋七月遣牙校貢馬

繼遷數寇夏州嘗與神衛指揮使許均一日十二
戰不能克乃遣左都押衙張浦指揮李光祚詣綏
州見內殿右班張崇貴偽求納款會于石堡砦崇
貴椎牛釀酒犒諭之給以錦袍銀帶浦等同繼遷
遂遣牙校以良馬入貢且謝過

八月遣弟延信入朝

繼遷知中國恩禮未衰遣從弟延信貢橐駝名馬入朝謝罪且言違叛事出保忠願赦勿誅太宗召見延信面加撫慰厚賚遣還

附 遼史蕭撻凜傳統和十二年夏人梗邊皇太

妃受命總烏古及永興宮分軍討之撻凜爲阻卜都詳穩凡軍中號令太妃悉委之師還以功封蘭陵郡王攷西夏傳是年書夏國入貢而聖宗紀不載梗邊事

至道元年

契丹統和十三年

春正月繼遷遣左都押牙張浦

入貢被畱不遣

繼遷叠次進獻太宗遣張崇貴賜以器幣茶藥衣服持詔諭之云旣除手足之親已失輔車之勢繼遷見之惶懼復遣張浦李光祚以良馬橐駝入貢

太宗令衛士翹關超乘引強奪槊于後園

李氏長編作衛

士數百輩射于崇政殿廷與宋史夏國傳異

俾浦等觀之初李延信還

賜勁弓三皆力及一石六斗繼遷意上欲威示戎裔非有人能挽也至是浦見士皆拓兩石弓有餘力大駭太宗笑曰羌人敢敵否浦曰羌部弓弱矢

短但見此長大人已遁矣況敢敵乎太宗謂曰戎人貧窶飲食衣被粗惡無可戀者繼遷何不束身自歸永保富貴浦頓首謝太宗以浦爲繼遷謀主授銀青光祿大夫檢校工部尙書鄭州刺史兼御史大夫充本州團練使畱之京師

三月獻馬契丹

繼遷聞宋畱張浦遣使獻馬契丹以自結

夏四月請禁邊軍盜掠

太宗詔令謹守疆場以所盜物還之

六月表乞夏州授鄜州節度使不受

繼遷遣使奉表言懷攜柔遠王者之洪規裕後光前子臣之私願臣先世自唐初向化永任邊陲迨僖廟勤王再忝國姓歷五代而恩榮勿替入本朝而封爵有加德並戴天情深拱極茲以家庭多難骨肉相仇遂致帳屬流離箕裘隕越庭堅之宗忽焉不祀若敖之鬼嗟其餒而臣雖拓跋小宗身是蓋臣後裔十世之宥義在褒忠三代之仁典昭繼絕聿維夏州荒土羌戶零星在大宋爲偏隅于渺

躬爲世守祖先靈爽應戀首邱明發私懷敢忘宗
土恭惟皇帝陛下垂天心之慈愛捨茲彈丸矜蓬
梗之飄零俾以主器誠知小人無厭難免僭越之
求伏祈聖主寬仁遠降哀全之詔曲成靡旣再造
莫酬臣不勝惶悚恐懼云云太宗覽奏知其詐遣
閭門制使馮訥中使賈繼隆持詔拜繼遷爲鄜州
節度使鄜州去延安止二小程其城周圍二十里
二土山在其中正當狗道嶺靈夏並隔沙磧川原
平坦繼遷以易受中國控制不奉詔

秋七月逐党項睡泥族于蕭關

西界蕃部不下數十萬帳始猶互相捍拒及繼遷兵勢寢盛自靈州北河外鎮戎軍環州至鐵子山賀蘭山西隴山內外黃河以東諸族無不帖服獨睡泥族首領哱逋不肯下繼遷以兵掠其七百餘帳哱逋兵潰奔蕭關副首領你乜逋遣子詣靈州請救太宗詔以資糧助之

還襲都鈐轄劉用兵于烏白池不克

劉用駐兵烏白池扼鹽夏要路繼遷輕兵襲之用

設伏以待斬首數千級奪馬五百餘匹繼遷大敗還

八月夏州獻嘉禾

趙保忠被執李繼隆選夏州家戶爲廳子軍送京師請授趙光嗣爲夏州團練使守其地光嗣獻嘉禾一函

按西陲倣擾民不聊生何瑞之有此書獻嘉禾下書寇清遠比事以觀其義得矣

九月訐奏轉運副使鄭文寶寇清遠軍

繼遷數窺靈夏太宗議城古威州拒之遣內侍馮
從順訪于轉運使鄭文寶文寶言威州在清遠軍
西北樂山之西水甘土沃有良木薪秸之利約蒞
蘆臨洮二河壓明沙蕭關兩戍東控固原北固峽
口城之誠便然自環州至伯魚伯魚抵青岡青岡
距清遠已皆兩舍而威州更去清遠八十里緣邊
有警繼遷引平夏勝兵三千據清遠之衝乘高守
險數百人守環州甜水谷獨家原傳箭野利十族
脇從山中熟戶党項誰敢不從又分千騎守磧北

要路則自環至靈七百里之地非國家所有豈一
威州可禦哉請先建清遠城爲頓師歸重之地則
朔方可安太宗從其議文寶至清遠畱屯數千人
親督其役繼遷親信酋長鬼囉鬼悉俄文寶誘以
金帛與手書要約畱其長子爲質令陰圖之事成
當授以刺史又豫漆木函以備馳獻繼遷首函發
民夫曳古碑石詣清遠圖紀功而鬼囉等悉以情
告繼遷上表請罪尋以千餘騎攻清遠文寶與守
將張延拒卻之

熟藏族首領乧遇復擊繼遷繼遷誘之降不聽

乧遇數攻繼遷奪牛馬三千餘繼遷使人誘之降
乧遇曰吾一心向漢誓死不移延州以狀聞太宗
授遇檢校司空賜帛五十匹茶五十觔

復削所賜姓名

繼遷雖叛連次入貢猶稱所賜姓名中國答詔因
仍不去會寇清遠太宗下詔嚴責復削之

冬十月攻兀泥族首領黃羅悉其族帳北走

党項兀泥族首領黃羅嘗以兵敗契丹繼遷誘與

之合不得淳化末偕兀泥中族首領佶移子突厥
羅內屬授懷化將軍領昭州刺史繼遷數舉兵攻
之黃羅不敢悉其族帳北遁數年不敢入貢

十一月遣使獻捷契丹

獻清遠軍及兀泥族捷也

十二月誘契丹兵犯府州

先是契丹招討使韓德威率數萬騎誘党項勒浪
鬼族犯府州觀察使折御卿敗之于子河汭夏州
逼近麟府德威旣敗繼遷爲之氣喪會御卿病繼

遷牒告契丹誘之入邊許以兵助御卿與疾出禦
德威聞之不進繼遷兵亦不出

西夏書事卷五終